

Paulo remimombe'ukwe Tito pegwarā epístola de Paulo a Tito

Paulo omondo kwatia Tito pegwarā

¹⁻⁴ Nde katu Tito, xe ra'y tee-rami, ereiko xevy. Hesu Cristo-rehe peteñxa jajerovia-gwi ojoe'ýi voi nhande. Xe Paulo amondo-ta nde-vy xe nhe'ë kwatia-rehe. Xe Nhandejáry rembigwái va'e, Hesu Cristo remimondo va'e ave. Aipota ojeroviave hese he'yirā Nhandejáry oiporavo va'ekwe gwive. Aipota oikwaa poräve anhetegwa va'e Nhandejáry re'ýi rekorā. Nhandejáry nhane moingove meme va'e ondice. Upe va'e nhe'ë-rehe ajerovia voi. Upéa-gwi ajapo inhe'ë.

Yma va'ekwe, “Amoingove va'erā íxupe oiko hagwā xe ndive opa e'ý rehevē” he'i va'ekwe nhande-rehe Nhandejáry. Ha'e ijapu e'ý rehevē he'i upéixa. Nde'i reíry voi. Áy oikwaa uka-ma katu nhande-vy yma he'i va'ekwe nhane renonderā mombe'u-vy. Hi'óra-py oikwaa uka-ma nhande-vy. Ombou va'ekwe inhe'ë oikwaa uka-vy nhande-vy. Ko'ã nhe'ë, “Emombe'u katu, Paulo” he'i va'ekwe xe-vy Nhandejáry. Omombe'u uka va'ekwe xe-vy xe remimombe'urā Nhandejáry nhane resende-haty. Upéa-gwi ajapo joty inhe'ë.

Amondo-ta nde-vy Tito xe nhe'ë kwatia-rehe. Tande rexakwaa rei katu Nhandejáry Nhande Ru, Nhandejáry Hesu Cristo ave. Tane mbopy'agwapy ave katu.

*Paulo oipota Tito omoingo Hesu reroviaha rerekwarā
(1 Tm 3.1-7)*

⁵ Aipota erejapo ãy xe ajapo e'ŷ va'ekwe. Upéa-rehe oroheja kuri Creta yvy y mbyte-py oĩ va'e-py. Emoingo tetã tetã-rupi Hesu reroviaha rerekwarā. Emoingo ingo katu íxupe xe nde-vy ha'e hagwe-rami. ⁶ Heko porã va'e emoingo herekwarā. Imandu'a porã meme hese va'e emoingo herekwarā. Hembireko reta e'ŷ va'e peteĩ voi hembireko va'e. Ta'y kwéry, tajýry kwéry ave ojerovia-ma ave Hesu Cristo-rehe va'e. Upeixagwa mante emoingo herekwarā. Oĩ gwembireko ndive e'ŷ oiko va'e. Oĩ naimba'ereroviáiry va'e ta'ýry. Oĩ ta'ýry nohendúi va'e inhe'ẽ, ojapose va'e rei ojapo va'e. Oĩ heta imandu'a vai va'e ta'ýry-rehe. Ani upeixagwa eremoingo teĩ Hesu reroviaha rerekwarā ramo. ⁷ Ha herekwa Nhandejáry nhe'ẽ-py ae onhangareko Hesu reroviaha-rehe. Upéa-gwi imandu'a porã hese va'e ae katu emoingo herekwarā. Oĩ ha'e seve oiko va'e, ipoxy pya'e a'e va'e, oka'u va'e, oporonupã va'e, oipotave tave rei ojéupe gwarã pirapire va'e. Ani upeixagwa eremoingo teĩ Hesu reroviaha rerekwarā ramo. ⁸ Onhomogwahẽ uka porã rei va'e-pe ae katu emoingo herekwarā. Oĩ ave gwĩ enterove va'e ndive ipy'a porã va'e, in-hakã porã va'e, tekoha-rupi oiko va'e, Nhandejáry-pe omboete va'e, ójehe ipu'aka va'e. Upeixagwa heko porã va'e-pe ae katu emoingo herekwarā. ⁹ Togwerovia porã anhetegwa va'e nhe'ẽ ojehesa rerova e'ŷ reheve. Nhambo'e hagwe-rami, togwerovia joty omombe'u hagwã

anhetegwa va'e Hesu reroviah-a-pe omokyre'ŷ hagwā. Onhe'ẽ mbojevy va'e-pe, "Neremombe'u porāi" he'i va'erā. Upeixagwa ogwerovia tee va'e emoingo katu herekwarā. ¹⁰ Oĩ heta inhe'ẽngendu e'ŷ va'e. Onhe'ẽ rei oporombotavy-vy. Upéixa heta oĩjudeu reko-rupi oiko vyteri va'e, "Penhepirekytī uka katu" he'i va'e. ¹¹ Upeixagwa-pe, "Anive ere-hekombo'e rei teĩ ereiko-vy" ere ae katu íxupe. Omokirirī hagwā inhe'ẽ rei rei va'e-pe emoingo katu Hesu reroviah-a rerekwarā. Gwī oporombotavy va'e ohesa rerova uka oiko-vy ójehe hóga-py oĩ va'e gwive. Ohekombo'e rei-vy ohesa rerova uka ójehe. Oipota ójehe gwarā pirapire oporombotavy-vy. Upeixagwa-pe tomokirirī katu íxupe. ¹² He'i araka'e hese hi'arandu va'e Creta yvy pygwa:

"Ijapu meme Creta yvy pygwa" he'i. "Mymba poxy-rami oiko va'e. Ipituva ramo jepe, okaruse joty"

he'i araka'e oyvy pygwa-rehe Creta yvy pygwa-rehe. ¹³ Anhetegwa voi upe hi'arandu va'e remimombe'ukwe. Upéa-gwi emandari ndari katu oporombo'e rei va'e-pe: "Anive erembo'e vai rei teĩ" ere ae íxupe. "Togwerovia porā ae anhetegwa va'e nhe'ẽ porā" ere íxupe.

¹⁴ "Tapehendu e'ŷ katu judeu kwéry remimombe'u rei. Teko rei remimombe'u ave tapehendu e'ŷ katu. Anhetegwa nhe'ẽ porā ae katu pehendu" ere íxupe kwéry. ¹⁵ Oĩ ipy'a potī va'e. Ndaipóri imongy'aharā. Oĩ ave ipy'a ky'a va'e, Nhandedjáry-rehe ojerovia e'ŷ va'e. Hembiapo porāse mo'ã oiko-vy, ha ojejavý joty oiko-vy, onhemongy'a rei joty oiko-vy. Ipy'a ky'a vaive ive

oho-vy. Upéa-gwi, “Anive erehekombo'e rei teĩ” ere oporombo'e rei va'e-pe. Ha'e kwéry ipy'a vai. Hembiapo vai ramo jepe, notĩ kwaái joty okwavy. ¹⁶ “Oroheko kwaa-ma Nhandejáry-pe” he'i rei ójehe hikwái. Ha jahexa kwaa ramo katu hese, jaikwaa voi hekoha. “Ndohekokaáiry nipo ra'e Nhandejáry-pe” ja'e hese. Nhandejáry rembijohu vai ojapo, nohenduséiry inhe'ẽ. Ha iporã va'e katu ndojaposéi voi. Upéa-gwi, “Anive erehekombo'e rei” ere íxupe.

2

Paulo oipota Tito ohekombo'e porã Hesu rervoviaha-pe

¹ Ha nde ae katu ehekombo'e porã Hesu rervoviaha kwéry-pe. “Pehendu katu anhetegwa nhe'ẽ tekoha-rupi peiko-vy” ere íxupe.

² Ha ituja va'e kwéry katu: “Ani peka'u teĩ peiko-vy” ere íxupe kwéry. “Penhemboete uka pende rapixa kwéry-pe. Ójehe ipu'aka va'e-rami peiko katu. Perovia porã katu anhetegwa nhe'ẽ. Pejohayhu tee katu peiko-vy. Pejererekko asy jave pekirirĩ joty katu peiko-vy” ere íxupe kwéry erenhemonhe'ẽ-vy.

³ Upéixa ave igwaigwĩ va'e kwéry-pe enhemonhe'ẽ katu: “Nhandejáry irũ reko-rupima peiko katu” ere íxupe. “Ani erenhe'ẽ rei rei teĩ nde rapixa-rehe. Ani ereka'u teĩ. Ereka'u ramo, ipu'aka va'erã opaixagwa rei nde-rehe. Ehekombo'e porã ae katu nde rapixa-pe” ere igwaigwĩ va'e kwéry-pe. ⁴ “Tekoha-rupi peiko pehekombo'e porã hagwã kunha omenda ramo

va'e-pe. Kunha omenda ramo va'e tohayhu oména kwéry-pe. Tohayhu ave omemby kwéry-pe ave.

⁵ Toiko ójehe ipu'aka va'e-rami. Ojoeko-rupi porã toiko ome ndive hekotí-vy. Topyta gwóga-py, tonhangareko ombo'apo-vy. Taipy'a porã. Ome nhe'ẽ-rupi toiko. Tekoha-rupi toiko kunhagwe pono omonhe'ẽ vai uka Nhandejáry nhe'ẽ-rehe gwapixa kwéry" ere gwaigwĩ kwéry-pe.

⁶ Upéixa ete kwimba'e kwéry ipyahu va'e-pe ave enhemonhe'ẽ katu: "Ójehe ipu'aka va'e-rami, peiko katu" ere íxupe.

⁷ Ha nde ejehexa uka porã íxupe, nde reko-rami oiko hagwã kwimba'e kwéry ipyahu va'e. Ere-hekombo'e javé, ani erehekombo'e rei teĩ. Enhemboete uka katu íxupe kwéry. ⁸ Anhetegwa va'e emombe'u íxupe. Peteíxa emombe'u porã meme katu. Aipo ramo ne nhe'ẽ ombojevy va'erãgwe nane nhe'ẽ mbojevyí va'erã. Oti va'erã ne nhe'ẽ mbojevy-ta mo'ã va'ekwe.

⁹ Ha onhemomba'apo uka va'e-pe enhemonhe'ẽ katu: "Pehendu meme katu nde járy nhe'ẽ" ere íxupe. "Oipota va'e gwive ejapo katu íxupe. Imbovy'a-vy ejapo íxupe. Ani erembohovái teĩ íxupe eremboete e'ŷ-vy. ¹⁰ Ani eremonda íxugwi. Ejehexa uka porã ae katu íxupe. Embojerovia uka katu íxupe ndéjehe. Aipo ramo peteíxa peiko meme katu ojehexa uka porã hagwã Nhandejáry rekoha, ojohu porã hagwã pende rexaháry Nhandejáry nhane resendehaty rehewa nhe'ẽ" ere íxupe.

¹¹ Nhandejáry nhande rexakwaa reihaty oikwaa uka-ma nhande-vy gwekoha nhande kwéry kente kwéry-pe nhane resende hagwã.

Upéa-gwi, “Enterove va'e resa-py peiko porã katu Nhandejáry-pe pemboete-vy” ere upe pygwa-pe. ¹²⁻¹³ Upéixa nhande resendeha ramo oiko-gwi, “Anive erejapo xe aipota e'ŷ va'e, ani erejapo nde erejapose va'e rei” he'i nhande-vy Nhandejáry nhande poriahuverekohaty. Ko yvy-py jaiko jave, iporã ae nhande pu'aka nhandéjehe. Iporã jaiko nhande rekoha jajejavý e'ŷ reheve Nhandejáry mbovy'a-vy, nhaha'arõ-vy íxupe. Nhandejáry Hesu Cristo ou tee jevy va'erã nhande rovasaharã. Nhane remiha'arõ ou tee jevy va'erã. Ha'e tuvixa mba'e, nhane resendeharã voi ha'e. Hendy mbaraete reheve, opu'aka reheve ou jevy va'erã. ¹⁴ Yma va'ekwe ojejuka uka nhande-rehe ha-py omboyke hagwã nhandéhegwi nhane rembiapo vaikwe, nhande py'a omopotí hagwã gwe'ýi marangaturã, nhane mokyre'ŷ hagwã jajapo porã hagwã. ¹⁵ Upeixagwa nhe'ë-py ehekombo'e mbo'e íxupe. Emokyre'ŷ upe pygwa-pe ojapo hagwã upéa nhe'ë. Ha henduse e'ŷha-pe katu enhemonhe'ë katu ojapo jevy hagwã. Nhandejáry nhe'ë-py enhe'ë. “Ha'e ae onhe'ë-py rei onhemonhe'ë” ani ereheja he'i nde-rehe. Ani ereheja nde-rehe onhe'ë vai.

3

Paulo omombe'u Hesu reroviaha rekora

¹ Aipota eremombe'u ko nhe'ë Hesu reroviaha-pe:

“Ani nde resarái mburuvixa kwéry-gwi. Gwĩ omanda va'e nhande-rehe, ani nde resarái” ere íxupe. “Pene mandu'a meme katu hese pehendu hagwã inhe'ë” ere íxupe. “Pejapo katu

inhe'ẽ. Pene kyre'ŷ katu iporã va'e apo-vy.* ² Ani erenhe'ẽ rei rei teĩ avave-rehe. Ani penhorairõ teĩ penhonhe'ẽ mbojevy jevy-vy. Pende reko kirirĩ ae katu ojóupe. Pende py'a porã reheve ae katu ave pejogwerekō" ere Hesu reroviahape. ³ Are va'ekwe nhande kwéry ave jaiko vai va'ekwe. Nhane arandu e'ŷ va'ekwe jaiko-vy. Inhe'ẽ rendu e'ŷ-vy ave jaiko va'ekwe. Inhe'ẽ rei va'ekwe nhane mbotavy. Nanhande pu'akái nhandéjehe va'ekwe opaixagwa ivai va'e teko rei ojapose va'e rei ojapo va'ekwe jajapo hagwã. Nhande py'a pohýi va'ekwe jaiko-vy. Nhane mandu'a meme va'ekwe nhane rembiapo vairã-rehe. Nhande rapixa mba'e jaipota rei nga'u va'ekwe. Ndaija'éiry rei nhande-rehe nhande rapixa. Nanhande a'éiry ojóehe. ⁴ Ha Nhandejáry nhane resendeha ae katu, jajejavý ramo jepe ojehexa uka porã joty nhande-vy va'ekwe. Nhande poriahuverekoha voi, nhande rayhuha voi Nhandejáry. ⁵ Ha'e nhane resende va'ekwe. Ndaha'ei nhane rembiapo porákwe-rehe nhane resende va'ekwe. Nhande poriahuverekō-gwi ae nhane resende va'ekwe. Upéi oiko-ma nhande py'a-py Nhe'ẽ Marangatu tee va'e, nhanhemopotí hagwã, nhande reko tujakwe oipe'a hagwã nhandéhegwi, nhanhembopyahu jevy hagwã jaiko-vy.* ⁶ Nhande py'a omohynyhẽ hagwã ombou va'ekwe nhande-vy Nhe'ẽ Marangatu tee va'e-pe ome'ẽ rei-vy. Hesu Cristo nhane resendeha nhande rayhu-gwi, ou va'ekwe Nhe'ẽ Marangatu tee va'e. Upéixa nhane resende

* **3:1** Rm 13.1; 1 Pe 2.13-14

* **3:5** Ef 2.8-10; 1 Pe 1.3

va'ekwe. ⁷ Nhane resende va'ekwe nhande-vy gwarā nhaha'arō va'e ome'ẽ hagwā nhande-vy. “Ipy'a potī” he'i-gwi nhande-rehe nhande poriahuvereko-vy, oipota jaikove meme indive. Upéa-gwi, “Peiko porā katu” ere meme Hesu rervoviaha-pe.

⁸ Anhetegwa voi ko nhe'ẽ ha'e va'e nde-vy. Iporā erejerovia ko nhe'ẽ-rehe. Upéa-gwi ani ne ate'ỹ teĩ erenhemonhe'ẽ-vy. Ne kyre'ỹ ae katu eremombe'u mbe'u-vy, Nhandejáry rervoviaha imongyre'ỹ-vy imohembiaipo porā hagwā. Upéixa hembiaipo porā ramo, iporā voi katu. Enterove rembijohu porā hembiapo. Upéa-gwi enhemonhe'ẽ nhe'ẽ katu ereiko-vy ereporombo'e-vy.* ⁹ Oĩ onhonhe'ẽ-rehe rei onhonhe'ẽ mbojevy jevy va'e. Ani erepena teĩ inhe'ẽ rei va'e-rehe. Heta ijypykwe pykwe réry-rehe ani erepena teĩ. Judeu rekoha rehewa nhe'ẽ-rehe, ani erenhonhe'ẽ mbojevy jevy teĩ. Ani nde poxy erenhonhe'ẽ mbojevy-vy hese. Upeixagwa inhe'ẽ rei nanhane mombaraetíry. Upéa-gwi ani erepena teĩ hese. Ani ne nhe'ẽngendu teĩ hese. ¹⁰ Oĩ ramo ndaijojaséiry va'e Hesu rervoviaha ndive, “Anive erejapo upéa” ere íxupe. Nane rendúi ramo, “Ani erejapo upéa” ere jevy íxupe. Mokõigwe ere íxupe. Upéi nane rendúi joty ramo, anive eremoirū íxupe. ¹¹ Upeixagwa oheja ra'e Nhandejáry rape. Ojejavy va'ety rei oiko-vy. Ojekwaa porā hese, ojehexa porā ave hekoha vaiha. Upéa-gwi ani eremoirū teĩ íxupe kwéry.

Paulo omombe'u omantu'aha onhe'ẽ apy-vy

* **3:8** 1 Tm 1.3-4; 2 Tm 2.14

12 Amondo-ta nde-vy Ártemas para'e, Tíquico para'e. Ogwahẽ ramo oho-vy nde ha-py, ne kyre'ŷ katu xe topa hagwã ereho-vy Nicópolis tetã-my. “Upe-py apyta-ta aha-vy ro'y jave” ha'e kuri xe py'apy-py xejéupe. **13** Ha Zenas preso oheja va'e mosẽ ukaha katu Apolo ndive oho-tama oyvugwi. Oho-tama jave, ne kyre'ŷ katu ave ipytygwõ-vy íxupe. Eme'ẽ íxupe hemikotevẽ oho mombyryve hagwã. **14** Taikyre'ŷ ave entéro Hesu reroviaha gwive hembiapo porã hagwã, gwapixa remikotevẽ me'ẽ-vy, oiko rei e'ŷ hagwã oporopytygwõ hagwã oiko-vy. **15** Opa-ta xe nhe'ẽ. Entéro Hesu reroviaha a-py oiko va'e omombe'u uka-ta peẽ-my omandu'aha. Ore ave oromombe'u uka-ta ore mandu'aha pende-rehe. Entéro Hesu reroviaha ne ndive oiko va'e ore rayhu va'e, oromombe'u uka-ta ave íxupe ore mandu'aha. Peẽ kwéry-pe tapende rexakwaa rei katu Nhandejáry pende rovasa-vy. Amém.

Nhandejáry Nhe'ẽ New Testament in Kaiwá (BR:kgk:Kaiwá)

copyright © 2006 Wycliffe Bible Translators, Inc.

Language: Kaiwá

Translation by: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaiwá

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 11 Nov 2022 from source files
dated 29 Jan 2022
7ba4d793-0e4f-5efd-8f91-509f2a6d9f6a